



Broj: 12-01-04-7-2041-4 /17  
Sarajevo, 25.04.2017. godine

**BOSNA I HERCEGOVINA**  
**PARLAMENTARNA SKUPŠTINA BOSNE I HERCEGOVINE**  
**SARAJEVO**

PRIMLJENO: 27-04-2017			
Organizaciona jedinica	Klasifikaciona oznaka	Redni broj	Broj priloga
03/1-	03-	1119/17	

**PARLAMENTARNA SKUPŠTINA BOSNE I HERCEGOVINE**  
**Zajednička komisija za odbranu i sigurnost**  
**n/r predsjedavajućeg, gđin Sifet Podžić**

**Predmet:** Izvještaj o radu Koordinacionog odbora za kontrolu malog i lakog naoružanja u BiH za 2016. godinu, dostavlja se, -

Poštovani,

Obavještavamo Vas da je Vijeće ministara Bosne i Hercegovine na 98. sjednici održanoj 12.04.2017. godine razmotrilo i usvojilo Izvještaj o radu Koordinacionog odbora za kontrolu malog i lakog naoružanja u Bosni i Hercegovini za 2016. godinu.

S tim u vezi, u prilogu akta dostavljamo vam pomenuti izvještaj na razmatranje i primanje k znanju na jednoj od narednih sjednica Komisije.

S poštovanjem,

**MINISTAR**  
**Dragan Mektić**

**Prilog:**  
(Kao u tekstu)  
**Dostaviti:**  
1 x naslovu  
1 x a/a  
**Fax i pošta**



---

**KOORDINACIONI ODBOR ZA KONTROLU MALOG I LAKOG NAORUŽANJA U  
BOSNI I HERCEGOVINI**

**IZVJEŠTAJ**

**o radu Koordinacionog odbora za kontrolu malog i lakog naoružanja u  
Bosni i Hercegovini za 2016. godinu**

**Sarajevo  
Mart, 2017. godine**

Koordinacioni odbor za kontrolu malog i lakog naoružanja u Bosni i Hercegovini, na osnovu člana 7. Odluke o imenovanju Koordinacijskog odbora za kontrolu malog i lakog naoružanja u Bosni i Hercegovini („Službeni glasnik BiH“ broj 95/13), Vijeću ministara Bosne i Hercegovine, p o d n o s i

## **IZVJEŠTAJ**

**o radu Koordinacionog odbora za kontrolu malog i lakog naoružanja u BiH za 2016. godinu**

### **I - UVODNE NAPOMENE**

Vijeće ministara Bosne i Hercegovine je u skladu sa Zakonom o Vijeću ministara Bosne i Hercegovine („Službeni glasnik BiH“ br. 30/03, 42/03, 81/06, 76/07, 94/07 i 24/08), na 69. sjednici održanoj dana 12.11.2013. godine, donijelo Odluku o imenovanju Koordinacionog odbora za kontrolu malog i lakog naoružanja u Bosni i Hercegovini (u daljem tekstu: KO SALW).

### **II - SASTAV KO SALW**

KO SALW je interesorno tijelo, formirano od deset institucija i policijskih agencija iz cijele Bosne i Hercegovine. U KO SALW je imenovan sekretar koji obavlja stručne, tehničke, administrativne i opće poslove.

### **III – NADLEŽNOSTI KO SALW**

Djelokrug poslova i zadataka KO SALW je planiranje, koordinacija, usmjeravanje i nadzor aktivnosti za implementaciju Strategije za kontrolu malog oružja i lakog naoružanja u Bosni i Hercegovini (2016-2020).

### **IV - IZVRŠENJE ZADATAKA IZ NADLEŽNOSTI KO SALW**

U izvještajnom periodu, na prijedlog KO SALW, Vijeće ministara BiH je usvojilo novu Strategiju za kontrolu malog oružja i lakog naoružanja u BiH.

Strategija za kontrolu malog oružja i lakog naoružanja u BiH za period 2016-2020. godina, je usvojena na 71. sjednici Vijeća ministara BiH, koja je održana 31. avgusta 2016.godine. Donošenju navedene strategije prethodilo je održavanje nekoliko radionica, gdje

su predstavnici KO SALW sa predstavnicima međunarodnih organizacija (UNDP, OSCE, SEESAC), zajednički usaglasili tekst strategije i akcionog plana.

Strategija predstavlja sveobuhvatan dokument kojem je cilj unaprijeđenje efikasnosti svih subjekata u oblasti kontrole malog oružja i lakog naoružanja. Strategija predstavlja nastavak i proširenje aktivnosti kojima je cilj daljnje jačanje efikasnosti svih subjekata u oblasti kontrole malog oružja i lakog naoružanja u Bosni i Hercegovini. Posebno je usmjerena na nastavak usklađivanja zakonodavstva s međunarodnim standardima, daljnje unapređenje kontrole unutrašnjeg i vanjsko-trgovinskog prometa oružja, smanjenje incidenata počinjenih oružjem i broja nelegalnog oružja u posjedu građana, unapređenje građanskog povjerenja u institucije u Bosni i Hercegovini na svim nivoima vlasti, kao i smanjenje viškova malog oružja i lakog naoružanja u posjedu Ministarstva odbrane Bosne i Hercegovine. Posebna pažnja je usmjerena na jačanje cjelokupnih administrativnih kapaciteta svih nadležnih tijela Bosne i Hercegovine. Implementacijom zacrtanih strateških ciljeva i daljnjim razvojem međunarodne i regionalne saradnje u ovoj oblasti, Bosna i Hercegovina će doprinijeti ne samo unapređenju opšte bezbjednosti u zemlji nego i u regionu i globalno.

Strategija obuhvata četiri oblasti koje su formulisane u četiri strateška cilja, i to:

1. Unaprijeđenje pravnog okvira i implementacije SALW zakonodavstva;
2. Smanjenje prisustva nelegalnog SALW-a;
3. Upravljanje SALW-om u posjedu Oružanih snaga BiH i
4. Međunarodna i regionalna saradnja i saradnja sa organizacijama civilnog društva.

U izvještajnom periodu, KO SALW je održao ukupno sedam (7) zajedničkih sastanaka, a imajući u vidu strateške oblasti navedene u akcionom planu nove strategije, realizovane su sljedeće aktivnosti i to:

## **Cilj 1. UNAPRIJEĐENJE PRAVNOG OKVIRA I IMPLEMENTACIJE SALW ZAKONODAVSTVA**

### **Programski cilj 1.1. Izrada analize stanja o usklađenosti domaćeg zakonodavstva u oblasti SALW**

U okviru navedenog strateškog cilja Strategija je prepoznala potrebu praćenja aktivnosti koje trebaju rezultirati harmoniziranjem zakona o držanju i nošenju oružja u BiH sa relevantnim propisima Evropske unije kao i jačanja međuagencijske saradnje na polju implementacije zakonodavstva vezanog za kontrolu unutrašnjeg i spoljnotrgovinskog prometa oružja radi adekvatne razmjene informacija i stajališta u vezi sa pitanjima iz nadležnosti različitih institucija uključenih u promet naoružanja.

Nakon što je Vijeće ministara BiH usvojilo „Informaciju o realizaciji aktivnosti vezanih za usklađivanje odnosno harmonizaciju zakona o oružju u BiH“, KO SALW je u izvještajnom periodu pratio aktivnosti u smislu realizacije navedene informacije.

S tim u vezi, dana 12. decembra 2016.godine, organizovana je radionica na temu „Pravni okvir u Bosni i Hercegovini za kontrolu malog oružja i lakog naoružanja sa međunarodnim i EU standardima”. Radionici su prisustvovali predstavnici nadležnih institucija iz Bosne i Hercegovine koje provode zakone iz ove oblasti, te međunarodni eksperti. Cilj Radionice bio je razmjena informacija i prezentacija aktivnosti nadležnih tijela vezano za usklađivanje propisa u Bosni i Hercegovini sa međunarodnim propisima.

Predstavnici kantonalnih ministarstava unutrašnjih poslova, Ministarstva unutrašnjih poslova Republike Srpske i Policije Brčko distrikta Bosne i Hercegovine su tokom radionice prezentovali trenutno stanje u oblasti usklađenosti zakona o oružju sa međunarodnim standardima.

Nakon izloženih prezentacija, konstatovano je da je šest institucija uskladilo zakone o oružju sa međunarodnim standardima u pitanjima koja se odnose na definicije oružja, kategorizaciju oružja, izgled isprava o oružju i kaznene odredbe. Zakoni o oružju usklađeni su u Kantonu 10, Tuzlanskom kantonu, Srednjobosanskom kantonu, Zeničko-dobojskom kantonu, Republici Srpskoj i Brčko distriktu BiH. Pored toga, konstatovano je da su i druga bitna pitanja koja tretira Direktiva Savjeta 91/477/EZZ o kontroli nabavke i posjedovanja oružja, tretirana pomenutim zakonima (elektronski registri, definicija brokera, norme kojimja se tretira trofejsko i kolekcionarsko oružje itd.).

Također, na osnovu prezentovanog stanja u oblasti usklađivanja zakona o oružju sa međunarodnim standardima, konstatovano je da ostali kantoni (Posavski kanton, Kanton Sarajevo, Hercegovačko neretvanski kanton, Bosansko podrinjski kanton, Unsko sanski kanton, Zapadnohercegovački kanton) koji nisu uskladili zakone o oružju, aktivno rade na donošenju novih zakona o oružju koji će biti usklađeni sa međunarodnim standardima, te da su zakoni o oružju u zakonodavnoj proceduri.

Tokom održane radionice međunarodni eksperti iz ove oblasti prezentovali su SEESAC-ovu analizu i procjenu pravnih okvira za kontrolu malog oružja i lakog naoružanja u regionu i BiH, kao i EU pravni okvir u ovoj oblasti – propisi i regulative.

Istaknut je značaj harmonizacije propisa o oružju, a posebno značaj ove oblasti u kontekstu obaveza Bosne i Hercegovine navedenih u poglavlju 24. Sporazuma o stabilizaciji i pridruživanju - Pravda, sloboda, sigurnost. S tim u vezi naglašene su obaveze koje proizilaze iz Direktiva EU, a koje moraju biti inkorporirane u zakonodavstvo Bosne i Hercegovine, a samim tim i u oblasti oružja.

U izvještajnom periodu usvojeno je nekoliko značajnih zakona u oblasti kontrole malog i lakog oružja. Zakon o izmjeni i dopuni Zakona o kontroli kretanja oružja i vojne opreme stupio je na snagu i objavljen je u Službenom glasniku BiH 22/16. Navedenim Zakonom detaljnije se regulišu određena pitanja vezana za kontrolu kretanja oružja i vojne opreme u BiH.

Usvojena su tri zakona iz oblasti kontrole vanjskotrgovinskog prometa roba i usluga od strateške važnosti za sigurnost BiH i to:

Zakon o kontroli vanjskotrgovinskog prometa oružja, vojne opreme i roba posebne namjene; („Službeni glasnik BiH“: broj: 53/16),

- Zakon o kontroli vanjskotrgovinskog prometa roba dvojne namjene („Službeni glasnik BiH“ broj: 53/16) i
- Zakon o obilježavanju malog oružja, lakog naoružanja i pripadajuće municije („Službeni glasnik BiH“, broj: 83/16).

### **Programski cilj 1.2. Jačanje kapaciteta u borbi protiv nelegalne trgovine SALW-om;**

Pripadnik Državne agencije za istrage i zaštitu, koji je i član KO SALW učestvuje u radu Mreže eksperata jugoistočne Evrope za mjere protiv nezakonite trgovine vatrenim oružjem (SEEFEN). U navedenoj Mreži su pored predstavnika policijskih tijela participiraju i predstavnici tužilaštva i carine. SEEFEN vrši istraživanja i kreira platformu za razmjenu informacija i razmjenu znanja. Tokom 2016.godine, održana su tri regionalna sastanka SEEFEN-a i to: 19-21.04.2016.godine u Sarajevu, 27-28.09.2016.godine u Kišnjevu, Moldavija i 08-09-12-2016.godine u Budvi, Crna Gora.

U sklopu Ekspertske grupe zemalja Zapdnog Balkana za sprečavanje nelegalne trgovine oružjem „SEEFEG koja egzistira od 2014.godine održan je jedan sastanak ekspertske grupe u Ohridu, Makedonija 14.10.2016. god, kao i sastanak Zajedničkog komiteta eksperata za vatreno oružje Evropske unije (EFE) i SEEFEG-a dana 30.11.2016.god. u Briselu.

Također, u 2016 godini, vršena je nabavka specifične opreme potrebne za jačanje kapaciteta u borbi protiv nelegalne trgovine SALW-om.

Uprava za indirektno-neizravno oporezivanje je aktivno sudjelovala u regionalnim i međunarodnim naporima za kontrolu malog i lakog oružja, za poboljšanje provođenja suštinskih instrumenata i mehanizama o malom i lakom naoružanju. Tokom 2016 godine, službenici UIO su učestvovali na dvije obuke koje su realizovane u sklopu EU P2P Programa kontrole izvoza naoružanja, te regionalnim sastancima u organizaciji SEESAC-a i EXBS programa.

Službenici Granične policije BiH učestvovali su na sljedećim obukama:

- Obuka na temu „ Borba protiv ilegalne trgovine vatrenim oružjem“ obuka završena od strane jednog policijskog službenika;
- Obuka na temu „IARMS baza podataka o oružju, obuka završena od strane jednog policijskog službenika ;
- Obuka na temu „Improvizovana eksplozivna sredstva, obuka završena od strane četiri policijska službenika;
- Obuka na temu „ Krijumčarenje droga i oružja „ obuka završena od strane devet policijskih službenika.

U organizaciji Američke Ambasade u BiH sprovedene su sljedeće obuke i to:

- Obuka na temu „ Otkrivanje i sprečavanje krijumčarenja u pojasu zelene ganice,, obuka završena od strane devet policijskih službenika;
- Obuka na temu „Korištenje Scoutgard kamere i Garmin Rino 650 GPS „obuka završena od strane petnaest policijskih službenika;
- Obuka na temu „ Korištenje Scoutgard makere i garmin GPS Uređaja,, obuka završena od strane šest policijskih službenika.

Granična policija je izradila Izvještaj o analizi rizika o prometu preko državne granice registrovanog, zaplijenjenog i predatog naoružanja, eksplozivnih naprava i druge opreme u BiH u skladu sa zakonima o oružju i municiji na nivou BiH, entiteta i Brčko distrikta BiH.

Ministarstvo unutrašnjih poslova Republike Srpske je aktivno učestvovalo u borbi protiv nelagalne trgovine SALW-om, i u tom cilju u saradnji sa policijom Kraljevine Švedske tokom 2016. godine, realizovana je međunarodna akcija kodnog naziva „WOLF RS“, prilikom koje je privremeno oduzeta veća količina oružja i minsko eksplozivnih sredstva, a koje je krijumčareno sa područja Republike Srpske na područje Švedske.

Kroz projekat “rad policije u zajednici” policijski službenici su na terenu u razgovorima sa građanima ukazivali o SALW-u, mogućnostima predaje oružja i zakonski predviđenim sankcijama za nelegalno posjedovanje oružja.

### **Programski cilj 1.3. Unaprijeđenje informacionih sistema za kontrolu SALW-a;**

Nadležne institucije su radile na unapređenju informatičkih sistema predviđenih provedbenim propisima iz ove oblasti. U Ministarstvu sigurnosti BiH kontinuirano se koristi Centralna elektronska evidencija o kontroli kretanja oružja i vojne opreme u BiH. U ovaj sistem uvezane su policijske agencije na entitetskom nivou, te ova evidencija predstavlja osnov za prikupljanje i analizu podataka o kretanju oružja i vojne opreme u BiH. U 2016. godini, prema podacima iz ovog sistema, Ministarstvo sigurnosti izdalo je 620 rješenja o kretanju oružja i vojne opreme što je za 30,5% više u odnosu na 2015. godinu.

Također, u 2016. godini podneseno je 262 zahtjeva za saglasnost za kretanje naoružanja unutar entiteta ili Brčko distrikta BiH ili kretanje između entiteta ili između entiteta i Brčko distrikta BiH, što je povećanje za 9,2% u odnosu na 2015. godinu.

Odlukom o određivanju međunarodnih graničnih prijelaza za promet naoružanja i vojne opreme, opasnih, eksplozivnih i radioaktivnih tvari i sredstava dvojne namjene („Službeni glasnik BiH“ broj 89/06, 48/08, 35/13 i 61/15) određeni su granični prijelazi za promet oružja i vojne opreme. Analizom Zahtjeva za odobrenje kretanja oružja i vojne opreme došlo se do podataka na kojim se graničnim prijelazima najčešće vrši izvoz/uvoz, i to:

- GP Aerodrom Sarajevo 212 uvoza/izvoza;
- GP Vardište 158 uvoza/izvoza;
- GP Orašje 143 uvoza/izvoza;
- GP Rača 50 uvoza/izvoza;
- GP Klobuk 15 uvoza/izvoza;
- GP Gradina 14 uvoza/izvoza;
- GP Čapljina 13 uvoza/izvoza;
- GP Kamensko 12 uvoza/izvoza;

GP Izačić 2 uvoza/izvoza;  
GP Gradiška 1 uvoza/izvoza.

Privredni subjekti koji najčešće izvoze i uvoze naoružanje i vojnu opremu su: „Unis Ginex“ d.d. Goražde, „Igman“ Konjic i „KM TRADE“ Sarajevo.

U skladu sa Pravilnikom o načinu i postupku nadzora i kontrole nad provođenjem zakona o kontroli kretanja oružja i vojne opreme, izvršena je jedna redovna kontrola nad kretanjem oružja i vojne opreme i 16 vanrednih kontrola gdje je dato ovlaštenje mjerodavnoj policijskoj agenciji za vršenje kontrole na ruti kretanja.

Ministarstvo vanjske trgovine i ekonomskih odnosa BiH, je sačinilo Analizu funkcionalnosti sistema „Tracker“, na osnovu koje su i urađene preporuka za unaprijeđenje ovog sistema. Sva potrebna dokumentacija je dostavljena donatoru, i dobijena je nova verzija sistema. Institucije BiH koje učestvuju u procesu davanja saglasnosti za izdavanje dozvola za uvoz i izvoz oružja i vojne opreme, koriste i bazu podataka SEESAC-a, na kojoj se može vršiti razmjena informacija između država regiona u pogledu SALW-a.

Također, unutar navedenog Ministarstva je uspostavljena baza podataka o svim izdatim dozvolama za uvoz/izvoz naoružanja i vojne opreme u skladu sa Zakonom o kontroli vanjskotrgovinskog prometa roba i usluga od strateške važnosti za sigurnost. Ovi podaci dostavljaju se u vidu Izvještaja Vijeću ministara BiH i Parlamentarnoj skupštini BiH.

Elektronska razmjena podataka između policijskih tijela i tužilaštava vrši se putem sistema za razmjenu podataka koji je uspostavljen 2012. godine. Centralni server za razmjenu podataka smješten je u Direkciji za koordinaciju policijskih tijela BiH koja vrši administriranje i održavanje centralne pristupne tačke za razmjenu podataka.

Policijske agencije koje razmjenjuju podatke iz Evidencija o oružju i potraga za oružjem su FUP, MUP RS-a, i PBD BiH. Podaci iz internacionalnog sistema IARMS ne razmjenjuju se putem ovog sistema.

Direkcija za koordinaciju policijskih tijela BiH-Odsjek NCB Interpol Sarajevo je pokrenuo inicijativu za realizaciju iARMS u BiH. iARMS -Sistem za vođenje i praćenje evidencija ilegalnog oružja dio informacionog sistema INTERPOL-a je najnoviji sofisticirani alat koji olakšava razmjenu informacija i istražnu saradnju između tijela za provođenje zakona vezano za međunarodno kretanje ilegalnog vatrenog oružja, kao i legalnog vatrenog oružja koje je bilo korišteno za počinjenje nekog krivičnog djela.

U svrhu realizacije aktivnosti održana je jednodnevna, a potom i dvodnevna obukaradionica, 16 i 17.08.2016.godine, koja je održana uz podršku OSCE-Odjel za sigurnosnu saradnju. Predavači na radionici su bili eksperti i Generalnog Sekretarijata Interpola Lion. U radu radionice pored predstavnika Direkcije, učestvovali su predstavnici 14 policijskih tijela iz BiH (SIPA, GP BiH, MUP Republike Srpske, Federalna Uprava policije, Policija Brčko Distrikta BiH, MUP Unsko-sanskog kantona, MUP Posavskog kantona, MUP Tuzlanskog kantona, MUP Zeničko-dobojskog kantona, MUP Bosansko-podrinjskog kantona, MUP Srednjobosanskog kantona, MUP Hercegovačko-neretvanskog kantona, MUP Kantona Sarajevo i MUP Kantona 10). Tokom radionice prezentovan je projekat iARMS i predložen praktični način rada u aplikaciji iARMS, kao i značaj upotrebe Interpolovog komunikacijskog sistema I-24/7 odnosno Interpolovih alata. Obuci jedino nisu prisustvovali predstavnici MUP-



a Zapadnohercegovačkog kantona, ali su isti prisustvovali istoj obuci koja je održana u organizaciji Direkcije dana 28.12.2015.godine, na kojoj su bili prisutni predstavnici svih policijskih tijela u BiH.

U postupku je potpisivanje Sporazuma o korištenju iARMS između Direkcije za koordinaciju policijskih tijela BiH, NCB Interpola Sarajevo i policijskih tijela u BiH koje su učestvovala na navedenoj radionici-obuci. Sporazum o korištenju iARMS potpisalo je 12 policijskih tijela.

#### **Programski cilj 1.4. Unaprijeđenje kontrole unutrašnjeg i vanjskotrgovinskog prometa SALW-om;**

Praćenje međunarodnih standarda i usklađivanje domaće legislative u oblasti vanjskotrgovinskog prometa i proizvodnje oružja i vojne opreme obavlja se kontinuirano. Zakon o kontroli vanjskotrgovinskog prometa oružja vojne opreme i roba posebne namjene usklađen je sa Zajedničkim stavom Vijeća EU 2008/944/CFSP od 08. decembra 2008. godine, kojim se utvrđuju pravila kojima se rukovodi kontrola izvoza vojne tehnologije i opreme, kao i sa Zajedničkim stavom Vijeća Evrope u vezi s kontrolom posredovanja u trgovini oružjem, Zajedničkom akcijom Vijeća Evrope o nadzoru tehničke pomoći u vezi s određenim vrstama vojne upotrebe, standardima koji su postavljeni Rezolucijom 1540 Vijeća sigurnosti UN o sprječavanju širenja oružja za masovno uništenje, kao i Konvencijom o zabrani ili ograničavanju određenih vrsta konvencionalnog oružja.

Održano je nekoliko tematskih sastanaka i okruglih stolova sa ciljem razmjene informacija i unapređenja međuagencijske saradnje te saradnje sa privrednim subjektima u oblasti vanjskotrgovinskog prometa i proizvodnje.

U saradnji s OSCE-om, dana 22.11.2016.godine, održana je Radionica sa privrednim subjektima koji se bave vanjskotrgovinskim prometom i proizvodnjom naoružanja i vojne opreme a u cilju prezentacije novog zakonodavstva vanjskotrgovinskog prometa naoružanja i vojne opreme.

Obavljen je inspekcijski nadzor nad 40 (četrdeset) privrednih subjekata koji se bave proizvodnjom i vanjskotrgovinskim prometom SALW-a.

## **Cilj 2. SMANJENJE PRISUSTVA NELEGALNOG SALW-a**

### **Programski cilj 2.1. Praćenje statističkih podataka iz oblasti SALW;**

Cijeneći bitnost statističkih podataka u ovoj oblasti KO SALW je svojim aktivnostima prikupio informacije sa terena vezane za izdavanje dozvola za uvoz/izvoz SALW-a, broj slučajeva i ukupne količine zaplijenjenog SALW-a na graničnim prelazima, podatke o uništenom oružju kao i o kampanjama i redovnim aktivnostima na prikupljanju oružja.

Ministarstvo vanjske trgovine i ekonomskih odnosa Bosne i Hercegovine je u toku 2016. godine izdalo 150 dozvola za uvoz malog oružja i lakog naoružanja i 37 dozvolu za izvoz malog oružja i lakog naoružanja.

Granična policija BiH u okviru svojih aktivnosti je zaplijenila je 17 komada SALW-a i 974 kom. municije na graničnim prijelazima.

Intencija Koordinacionog odbora za kontrolu SALW-a, prilikom usaglašavanja obrasca za prikupljanje informacija o SALW-u bila je da se osim gore pomenutih podataka prikupe i podaci o broju dozvola za držanje i nošenje oružja, kao i podaci o broju slučajeva nelegalnog SALW-a, te količini oružja prikupljenom u slučajevima nelegalnog SALW-a. Međutim, zbog različite metodologije u vođenju ovih podataka, podaci nisu prikupljeni.

U narednom periodu, planirane su aktivnosti na usaglašavanju metodologije prikupljanja navedenih podataka svih policijskih agencija, kako bi se mogli pratiti trendovi u ovoj oblasti, a kako bi podaci bili prikupljeni do sačinjavanja slijedećeg izvještaja.

### **Programski cilj 2.2. podizanje svijesti o rizicima SALW-a;**

Ministarstvo sigurnosti Bosne i Hercegovine je kroz obraćanja ministra i zamjenika ministra i predstavnika u KO SALW, na svim događajima i obraćanjima, a u cilju podizanja svijesti građana, ukazivalo na problem nelegalnog oružja i minsko eksplozivnih sredstava u Bosni i Hercegovine.

Kroz nadležnu organizaciju Ministarstva sigurnosti Bosne i Hercegovine, a u saradnji sa međunarodnim organizacijama u Bosni i Hercegovini, provedene su aktivnosti u značajnom broju osnovnih škola i općina, gdje se, u prvom redu učenicima, nastavnicima i građanima, govorilo o opasnostima od minsko-eksplozivnih sredstava i oružja.

Ministarstva unutrašnjih poslova u Bosni i Hercegovini provodili su aktivnosti usmjerene ka smanjenju nelegalnog oružja i minsko eksplozivnih sredstava u posjedu građana, u cilju podizanja svijesti građana o negativnim stranama posjedovanja oružja, te mogućnosti dobrovoljnog predavanja oružja nadležnim policijskim agencijama.

Na području Brčko Distrikta BiH, kroz projekat "rad policije u zajednici" policijski službenici su na terenu u razgovorima sa građanima ukazivali o SALW-u, mogućnostima predaje oružja i zakonski predviđenim sankcijama za nelegalno posjedovanje oružja. Ostvarena je i saradnja sa timom za deminiranje, gdje je u školama i u mjesnim zajednicama ukazivano učenicima i građanima o mogućim posljedicama SALW-u.

Tokom 2016 godine, kroz rad policije u zajednici od strane policijskih službenika izvršena su predavanja u 19 osnovnih škola na temu opasnosti od minsko eksplozivnih stvari, kojom prilikom je predavanje odslušalo 1280 učenika.

Na području Republike Srpske, Zakon o oružju propisao je provođenje amnestije za građane koji dobrovoljno predaju oružje, municiju i minsko eksplozivna sredstva do 31.12.2016.godine.

### **Programski cilj 2.3. Prikupljanje i uništavanje nelegalnog SALW-a;**

Kada su u pitanju aktivnosti vezane za prikupljanje i uništavanje nelegalnog SALW-a prema dostupnim podacima koje je KO SALW prikupio, podaci su slijedeći:

<b>KOLIČINE UNIŠTENOG SALW-a NA GODIŠNJOJ OSNOVI</b>	
<b>GODINA</b>	<b>2016</b>
<b>MO BIH</b>	<b>4.958.599 kom metaka</b>
MUP Republike Srpske	110 kom. oružja 2 ručna bacača raketa zolja 4447 kom MIMES-a 6,5 kg TNT eksploziva 250 grama crnog baruta
MUP Unsko-sanski kanton	147 kom oružja 1874 kom MIMES-a 40 kom ostalo
MUP Posavski kanton	8 kom oružja 708 kom MIMES 2,7 kg eksploziv 11 kom spremnik streljiva za automatsku pušku.
MUP Tuzlanski kanton	109 kom 4171 MIMES 85 kom opreme
<u>MUP Zeničko-dobojski kanton</u>	202 kom. oružja 176 kom. dijelova za oružje i opreme
MUP Bosansko-podrinjski kanton	/
MUP Srednjobosanski kanton	56 kom
<u>MUP Hercegovačko-neretvanski kanton</u>	101 kom
MUP Zapadnohercegovački kanton	23 kom
MUP kanton Sarajevo	/
<u>MUP kanton 10</u>	32 kom
<u>BRČKO DISTRIKT</u>	/
<b>U K U P N O</b>	<b>788 kom oružja</b>  <b>4.969.799 kom MIMES-a</b>

	<b>9,2 kg eksploziva</b>  <b>250 gr baruta</b> <b>2 ručna bacača</b>  <b>312 kom ostalog</b>
--	---

Dio od ukupne količine uništenog oružja naveden u prethodnoj tabeli, uništen je u prilikom obilježavanja Međunarodnog dana uništavanja oružja, u Fabrici "Jelšingrad" u Banjoj Luci, 09.07.2016.godine, kada je uništeno 1.008 komada malog oružja i lakog naoružanja.

<b>Broj komada predatog SALW-a, koji je prikupljen u okviru kampanja ili u okviru redovnih aktivnosti koje preduzimaju policijske agencije, a koje su imale za cilj prikupljanje SALW-a</b> <b>2016</b>		
	Naziv kampanje	Broj komada predatog SALW-a
<b>MUP Republike Srpske</b>	Redovne aktivnosti	390 kom oružja, 2648 kom. MIMES, 6,1 TNT, 250 g crnog baruta i
<b>MUP Unsko-sanski kanton</b>	Dobrovoljna predaja oružja i municije i Redovne aktivnosti	741 kom oružja 213 kom MIMES-a Ostalo 1 kom
<b>MUP Posavski kanton</b>	Kampanja i  Redovne aktivnosti	12.091 kom MIMES 1 zolja 4,4 kg Eksploziva 2,5 m sporogorućeg štapina
<b>MUP Tuzlanski kanton</b>	„budi na pravoj strani,	3084 kom (oružje i municija)

	izaberi život bez oružja" Redovne aktivnosti	
MUP Zeničko-dobojski kanton	/	/
MUP Bosansko-podrinjski kanton	Aktivnosti uništavanja oružja u skladištima policijskih agencija	16 kom.
MUP Srednjobosanski kanton	„budi na pravoj strani, izaberi život bez oružja“	18 kom..
MUP Hercegovačko-neretvanski kanton	„Biraj život bez oružja“	101 kom.
MUP Zapadnohercegovački kanton	Akcija „Žetva“	5 kom. 10 kom MES
MUP kanton Sarajevo	/	/
MUP kanton 10	„Žetva“ ukupno za 2016.	15 kom. oružja 1 RRB zolja 3669 kom MIMES-a 0,500 gr eksploziva 18 spremnika za municiju
BRČKO DISTRIKT	Redovne aktivnosti	26 kom oružja 197 kom MIMES

Federalno ministarstvo unutrašnjih poslova je u 27 slučajeva nelegalnog SALW-a oduzelo 27 kom oružja, 15 kom MES, 4.605 kom municije i 1,9 kg eksploziva.

Državna agencija za istrage i zaštitu je provela pet provedenih operativnih akcija u okviru kojih je privremeno oduzeto 37 kom. oružja, 3259 kom. metaka, 19 bombi, 6 mina, 10 kg eksploziva, 100 kg žive, tri tromblona, jedna granata.

#### **2.4 „Unaprijeđenje kapaciteta za čuvanje, skladištenje i uništavanje SALW-a u policijskim agencijama“**

U okviru realizacije aktivnosti predviđenih Strategijom za kontrolu malog oružja i lakog naoružanja (2016-2020) sa pripadajućim Akcionim planom, a u vezi sa ciljem 2. Smanjenje prisustva nelegalnog malog oružja i lakog naoružanja – 2.4. unaprijeđenje

kapaciteta za čuvanje, skladištenje i uništavanje SALW-a u policijskim agencijama, službenici Ministarstva sigurnosti BiH, koji su prethodno prošli obuku vezanu za sigurnost skladišta oružja i municije, su u periodu septembar/oktobar 2016 izvršili obilazak skladišta u ministarstvima unutrašnjih poslova u Bosni i Hercegovini, radi utvrđivanja trenutnog stanja i prijedloga za unapređenje standarda za čuvanje oružja i municije u skladištima policijskih agencija u BiH.

Službenici koji su vršili obilazak imali su za cilj da utvrde postojanje minimalnih standarda koji su propisani Standardima EU. Obzirom da su ovi standardi jako rigorozni, i vrlo teško primjenjivi u našoj zemlji, vodilo se računa o minimalnim standardima nepohodnim za što sigurnije čuvanje i upravljanje zalihama SALW-a. Posebno se vodilo računa o fizičkoj sigurnosti, odnosno procedurama koje su osmišljene da se spriječi neovlašten pristup objektima, opremi i sredstvima, i da se zaštiti osoblje i imovina od oštećenja i povreda. Također, utvrđivalo se stanje vezano za sigurno evidentiranje, skladištenje, transportovanje i postupanje sa SALW-om.

Na osnovu izvršenog uvida u trenutno stanje opremljenosti skladišta u BiH, može se konstatovati da nekoliko skladišta ne zadovoljavaju ni minimalne uslove za čuvanje SALW (Posavski kanton, MUP KS i MUP HNK). Nekoliko skladišta imaju minimalne standarde za čuvanje SALW (MUP ZHK, MUP ZDK, MUP USK), dok neki zadovoljavaju standarde (Policija Brčko distrikta).

Na osnovu informacije koju je dostavio MUP-a Republike Srpske a vezano za stanje skladišta, može se konstatovati da u istom takođe ne postoje adekvatna policijska skladišta za oružje i municiju koja u potpunosti ispunjava uslove u smislu prostornih, tehničkih i bezbjednosnih uslova.


### **Cilj 3. UPRAVLJANJE SALW-OM U POSJEDU ORUŽANIH SNAGA BIH**

#### **Programski cilj 3.1. Rješavanje viškova SALW-a u posjedu OS BiH;**

Ministarstvo odbrane BiH je realizovalo operacije demilitarizacije MiMES-a za 2016. godinu, u skladu sa Planom operacija sa MiMES-a, i u skladu sa Odlukama Predsjedništva BiH i to:

- demilitarizacija 2.053 tone različitog MiMES-a koje je demilitarizovano kroz tehnološke postupke delaboracije, termičke obrade i detonacije na otvorenom;
- donacija 27.000 komada (573 tone) različitog MiMES-a Vladi Republike Iraka;
- donacija 20.000 komada municije 7,62x39 mm Ministarstvu pravde Republike Srpske-KPZ Banja Luka;
- donacija 50.000 komada municije 7,62x39 mm, Federalnom ministarstvu unutrašnjih poslova.

Operacije demilitarizacije realizovane su kroz kapacitete kojima raspolažu OS BiH, kapacitete namjenske industrije u BiH kao i regionalne kapacitete, a sve kroz projekat EXPLODE kojega implementira Razvojni program Ujedinjenih nacija u BiH, uz finansijsku potporu EU kao i kroz Tehnički aranžman za pomoć u uništavanju lakog oružja i raznih vrsta municije potpisanim između Vjeća ministara BiH i State Departmenta SAD.



U 2016. godini Ministarstvo odbrane nije vršilo uništavanje malog oružja i lakog naoružanja (SALW) iz kategorije viškova za OS BiH.

Kontinuirano se saraduje sa Državnom agencijom za istrage i zaštitu i sudovima u BiH na preuzimanju i uništavanju SALW-a izuzetog iz krivičnih dijela, prilikom čega se isto uništava u sklopu kapaciteta sa kojima raspolažu OS BiH.

Zaključkom Predsjedništva BiH iz januara 2016. godine zaduženo je Vijeće ministara BiH da pokrene proceduru izrade sustavnog dokumenta kojim će se regulisati skladištenje, čuvanje i uništavanje oružja i MiMES-a oduzetog u sudskim procesima, a što je i učinjeno na 65. Sjednici Vjeća ministara BiH održanoj dana 21.07.2016. godine, na način da je formirana Interresorna radna skupina za izradu dokumenta koji će cjelovito i sistemski regulirati gore navedenu oblast.

Ministarstvo odbrane Bosne i Hercegovine trenutno u skladištima Oružanih snaga BiH raspolaže sa cca 10.500 tona (bruto) viškova municije i MES-a i sa cca 40.000 komada naoružanja, a koje je kategorisano kao višak. Postupak rješavanja istog realizira se u skladu sa principima rješavanja viškova, definiranim Odlukom Predsjedništva Bosne i Hercegovine (prodaja, donacija, uništavanje).

**Programski cilj 3.2. Kontrola i nadzor rješavanja viškova SALW-a u posjedu OS BiH;**

Ministarstvo odbrane je u skladu sa Odlukom Predsjedništva BiH, a na osnovu Sporazuma o konačnom raspolaganju svim pravima i obavezama nad pokretnom vojnom imovinom (2008. godina - Doboj), formiralo Komisiju za vođenje postupka rješavanja viškova pokretne vojne imovine (naoružanje i MiMES). Nadležnost Komisije je donošenje

odluka o načinu i modalitetima rješavanja viškova (prodaja, donacija i uništavanje) kao i kontrola navedenih modaliteta.

Formiran je i Strateški komitet za naoružanje, municiju i minsko-eksplozivna sredstva, koji predstavlja tijelo utemeljeno sa primarnom svrhom za rješavanje viškova naoružanja, municije i minsko-eksplozivnih sredstava koja su pod kontrolom Oružanih snaga Bosne i Hercegovine.

U radu ovog komiteta kao punopravni članovi pored predstavnika MO i OS BiH učestvuju i predstavnici NATO u BiH, EUFOR-a, UNDP-a u BiH, OSCE-a u BiH, delegacije EU u BiH, Ambasade SAD u BiH, Ambasade Švicarske u BiH, Ambasade Austrije u BiH, Ambasade Njemačke u BiH, Ambasade Švedske u BiH, Ambasade Velike Britanije u BiH.

Tokom 2016. godine održana su 4 (četiri) zasjedanja Strateškog komiteta za naoružanje, municiju i minsko eksplozivna sredstva.

### **Programski cilj 3.3. Unapređenje kapaciteta za skladištenje i čuvanje SALW-a u posjedu OS BiH;**

Ministarstvo obrane BiH raspolaže sa 5 perspektivnih skladišta u kojima je uskladišteno 8.783 tone SiMES-a i 8 neperspektivnih skladišta u kojima je uskladišteno 8.708 tona SiMES-a i 3 tranzitna skladišta u kojima je uskladišteno oko 558 tona SiMES-a

Ministarstvo odbrane BiH je u sklopu projekta SECUP kojeg implementira OSCE u BiH i projekta EXPLODE kojeg implementira UND u BiH uz finansijsku podršku EU realizovalo infrastrukturno uređenje četiri lokacije skladištenja od čega su dvije lokacije skladištenja MiMES-a (LSM „Krupa“ Hadžići i LSM „Kula“ Mrkonjić Grad) i dvije lokacije skladištenja naoružanja („TBT“ Visoko i „Rabić“ Devent). Navedene aktivnosti obuhvatile su uređenje skladišnih prostora, žičanih ograda, prateće infrastrukture, instalaciju sistema video nadzora čime je unaprijeđen državni standard fizičke sigurnosti kao i standard upravljanja zalihama naoružanja i MiMES-a. Cjelokupan projekat financiran je donacijama Švicarske, Njemačke, Norveške, Ujedinjenog Kraljevstva, Turske, Danske, Češke Republike i Lihtenštajna.

### **Programski cilj 3.4. Unapređenje informacionih sistema za kontrolu SALW-a u posjedu OS BiH;**

Ministarstvo odbrane BiH posjeduje informacioni sistem DARE Version 4.0 koji služi za kontrolu kvantitativnog stanja naoružanja, municije i MES-a. Ažuriranje evidencije po istom se vrši svakodnevno, odnosno prilikom svakog „pokretanja“ naoružanja, municije i MES-a.



## **Cilj 4. MEĐUNARODNA I REGIONALNA SARADNJA I SARADNJA SA NEVLADINIM ORGANIZACIJAMA**

### **Programski cilj 4.1. Multilateralna i bilateralna suradnja na planu kontrole SALW-a;**

Ministarstvo inostranih poslova Bosne i Hercegovine u sklopu svojih redovnih aktivnosti promovira univerzalnost ATT (Arms Trade Treaty), globalnog Sporazuma o trgovini oružjem i njegovu implementaciju u praksi. Kao što je poznato Bosna i Hercegovina je potpisala i ratifikovala ATT(Arms Trade Treaty), Sporazum kojim se utvrđuju najviši zajednički međunarodni standardi za uvoz, izvoz i transfer konvencionalnog oružja. Bosna i Hercegovina se obavezala da će primjenjivati ovaj Sporazum na konzistentan, objektivan i nediskriminirajući način imajući u vidu principe na koje se odnosi Sporazum.

Odredbe Sporazuma doprinose međunarodnom i regionalnom miru, bezbjednosti i stabilnosti tako što sprečavaju međunarodni transfer oružja koji bi doveo do ozbiljnog kršenja ljudskih prava, međunarodnog humanitarnog prava, povreda propisa Savjeta bezbjednosti UN-a o sankcijama, embargu i drugim međunarodnim obavezama kod oružanih sukoba, trans-nacionalnog organizovanog kriminala i terorističkih aktivnosti, što podrijava mir, pomirenje, bezbjednost, stabilnost i održiv socijalni i ekonomski razvoj.

U okviru svojih redovnih aktivnosti obavljale su se konsultacije sa zemljama regiona po pitanju kontrole izvoza naoružanja i vojne opreme, te učestvovalo u EU Outreach Program na planu kontrole konvencionalnog oružja i proizvoda dvojne namjene.

Redovno su provođene aktivnosti na ispunjavanju obaveza prema međunarodnim organizacijama (UN/OSCE), kao i Sekretarijatu ATT. Kroz proces izvještavanja umnogome je unapređena transparentnost u ovoj oblasti, ali i međunarodna reputacija Bosne i Hercegovine.

Ministarstvu inostranih poslova BiH je aktivno saradivalo sa međunarodnom organizacijom Conflict Armament Research(CAR), koja je uz podršku EU radila na identifikaciji i praćenju puteva snabdjevanja oružjem u ratnim sukobima.

U protekloj godini od strane unutrašnjih organizacionih jedinica Sektora za međunarodnu operativnu policijsku saradnju, Direkcije za koordinaciju policijskih tijela BiH, postupano je po zahtjevima međunarodnih organizacija, sa kojim je saradnja u nadležnosti Direkcije, i država članica tih organizacija, kao i na osnovu zahtjeva domaćih nadležnih organa u cilju sprječavanja i rasvjetljavanja krivičnih djela u vezi sa ilegalnom trgovinom vatrenim oružjem i eksplozivnim sredstvima. S tim u vezi, u ovoj godini postupano je po 190 novih predmeta vezano za navedenu problematiku, od toga 20 zahtjeva domaćih policijskih agencija koje zahtjevaju međunarodnu saradnju kao i postupanje po predmetima iz prethodnih godina.

Nastavljena je saradnja sa EXBS Programom Vlade SAD.

Kada je u pitanju saradnja sa Razvojnim programom UN-a (UNDP), i SEESAC aktivnosti ove međunarodne organizacije ogledali su se u realizaciji sljedećih strateških ciljeva:

- Organizovane su i održane 3 pripremne radionice sa SALW KO BiH na temu pripreme Strategije za kontrolu SALW-a u BiH 2016 – 2020;

- Pružena je tehničku podršku u izradi, dizajnu i štampanju Strategije za kontrolu SALW-a u BiH 2016 – 2020;
- Organizovano je i koordinirano uništavanje oružja i obilježavanja Međunarodnog dana uništavanja oružja 9. jula (uništeno 1008 komada SALW-a i pripadajuće opreme);
- U saradnji sa SEESAC-om, organizovana je jednodnevnu radionicu na harmonizaciji SALW legislativnog okvira u BiH.

Pored toga, KO SALW je saradivao sa Regionalnim uredom za kontrolu malog i lakog naoružanja (SEESAC), sa kojim je ostvarena sljedeća saradnja:

1. Nastavljena je podrška u pripremi i objavljivanju regionalnih izvještaja o realizovanom uvozu i izvozu naoružanja i vojne opreme;
2. SEESAC je angažovao eksperta koji je učestvovao u izradi analize i procjene pravnih okvira za kontrolu malog oružja i lakog naoružanja u regionu i BiH, kao i EU pravnog okvira u ovoj oblasti – propisi i regulative;
3. SEESAC je nastavio podršku MVTEO za održavanje baze podataka o izdatim dozvolama za uvoz/izvoz naoružanja i vojne opreme kroz dalje unapređenje AAERG softvera;
4. Zemlje regiona (Albanija, Bosna i Hercegovina Crna Gora, Hrvatska, Makedonija i Srbija) su podržale uspostavljanje baze podataka o kompanijama registrovanim za brokering u prometu naoružanja i vojne opreme.
5. Održano je nekoliko regionalnih sastanaka koordinatora za SALW, tokom kojih se razmatrala problematika u oblasti SALW-a, te su tom prilikom doneseni određeni zaključci.

Predstavnici KO SALW redovno učestvuju na regionalnim SALW konferencijama i ostalim skupovima bitnim za problematiku SALW.

## **PROBLEMI U RADU KO SALW**

U realizaciji projekata koji su dio Strategije i akcionog plana za kontrolu malog oružja i lakog naoružanja u BiH, većina projekata realizuju se putem donatorskih sredstava međunarodnih organizacija (SEESAC, OSCE, UNDP - EXPLODE, SECUP itd). Problemi pri realizaciji projekata vidljivi su zbog nedostatka finansijskih sredstava iz budžeta BiH.

Pored toga, KO SALW se i dalje susreće sa problemima prikupljanja statističkih podataka o SALW, jer policijske agencije u BiH na različit način prikupljaju navedene podatke.

## **V. PRIJEDLOG ZAKLJUČAKA**

Polazeći od naprijed navedenog, predlaže se Vijeću ministara Bosne i Hercegovine, da nakon razmatranja Izvještaja o radu Koordinacionog odbora za kontrolu malog i lakog naoružanja u Bosni i Hercegovini za 2016. godinu, donese sljedeće:

### **ZAKLJUČKE**

- 1. Usvaja se "Izvještaj o radu Koordinacionog odbora za kontrolu malog oružja i lakog naoružanja za 2016. godinu";**
- 2. Zadužuje se Državni koordinator za kontrolu malog oružja i lakog naoružanja da Izvještaj dostavi nadležnim državnim i entitetskim tijelima na upoznavanje kao i Zajedničkoj komisiji za odbranu i sigurnost BiH, Parlamentarne skupštine Bosne i Hercegovine, u vidu informacije.**